

東西哲衡

卷上下

西歷一千九百零八年

東西哲衡

明治四十一年

福州美華書局活板

東西哲衡序

嚮也。余讀王仲壬論衡一書，見有爲之序者，微其號曰帝王衡，謂其辯論雄富，卓越千古，甚有問孔刺韓非孟之說，非僅有功於一市。若夫中華之理學者，莫不被其澤焉。今讀鷺江李春生先生東西哲衡之作，所言理正詞嚴，辯論嶄新，皆發前人未有者，誠謂傾絕一世，噫亦偉矣。蓋王氏之衡，乃以古衡古，無補於今。先生之衡，乃以古衡今，有造於今，且人之所衡者，或限之於一市，或局之於一部，或囿之於一國。今先生之衡，得毋謂衡一世界乎？不然者，烏謂乎東西哲衡耶？抑此東西哲衡爲義，豈易名哉？顧世有短先生者，謂其武斷，謂其黨伐，謂其僭謊，亦有鄙其強爲蚍蜉撼樹者。獨余更壯其剛毅坦直，有勇知方，因論衡一書，被辯者雖聖如孔子，且不能免，又況萬不及孔子者，詎能僥倖無有議其後者？蓋值此世尙自由，言路不禁，安知將來不有許多詭邪之徒繼起，恃其一知半解，專以四兩破千觔之術爲教，欺罔於一市，一市受惑，沿至天下，若是者

爲害豈鮮哉。所願後此復有新學界中人之持大衡。若先生者繼起。懾彼詭邪
雄心。不敢明目張胆。以肆其伎倆。斯其有造於人間世豈淺哉。最奇者。如斯之
大衡。不起於世家貴族。碩彥鴻儒。偏出於一市之儈。是豈衡本於市。非市儈則
不知衡耶。否則先生之有是衡也。必爲天授之者。非人之所能爲也。

明治四拾壹年歲戊申六月吉日

溫陵黃秋月謹誌

東西哲衡例言

一是書內容專爲辯論，晚近東西哲學家，新著學說，凡有關害政治宗教世道人心，靡不擇其尤者，搜羅畢致，揭而出之，重加書後，以質同志，蓋道以高超，理以真勝，公道在人，讀者其毋以蚍蜉不足撼樹，則可云爾。

一是書乃繼天演論書後而作，所論皆爲答辯起見，故凡事異而理同者，不得不再以同理辯其異事，無奈人多事雜，則用以辯之者，不免雷同而出，讀者其毋以重複爲嫌，自不失反覆叮嚀，示人深切之意。

一是書既爲答辯而作，則凡平日出言，攻詰我道，譏訛我教者，不能不悉錄其短，而糾正之，以表一是俱是，一非皆非，若是者，不能不旁搜曲援，據理直書，以示君子不黨，蓋人之辯我者如是，我之答辯安得不然，讀者宜其知予不得已，非好辯也，況今之文明天下，乃一辯學世界，非辯則無以見真理，明至道，故曰學問之道，所貴在辯，蓋辯得其勝者，國藉以富，民藉以強，且可執牛

耳於文明世界之舞臺，反是而甘爲闇昧不辯者，亦未有不家破國亡，民爲臣妾奴隸，所以先哲云：博學、審問、慎思、明辯、篤行，五者不可缺一。

一是書約近十萬言，包舉一切天文、地輿、格物、哲學、人情、物理，而其最尤者，莫如宗教神學。著者自信所論所辯，皆純道至理，無些須苟簡假借，黨同伐異，猶幸文理粗淺，雖在中人以下，不必檢字典考故事，一目了然。

一是書動引典故，或選他人原文，或全章，或短句，蓋非此不能使讀者，如對鏡觀像，按圖索驥，相挈比較，瞭然辯者何居，答者何義，立見水落石出。

一是書雖冒昧備爲教會中人，或內地傳道牧師，默契心得之用，凡教外諸君，虛心喜讀者，亦未始不可公諸同好，以期善欲人同，讀者總毋以教會中人所著者，不堪問世，則可云爾。

一是書雖謏鄙無文，然所關出入人間世，極鉅且重，不但教會中人宜讀，亦爲無論何等社會，或外交家、哲學者，與夫新學界中人，萬不可少之善本。

東西哲衡上卷目次

懲妄擬宇宙胚胎之謬

懲妄擬地球年齡之謬

懲妄擬四千年未旦之謬

原人解

創造對自然

續創造對自然

懲實驗考據之謬

續懲實驗考據之謬

再續懲實驗考據之謬

懲強存弱亡之謬

懲物競淘汰之謬

懲誨人治與天行相頡頏

懲訟天道不直之謬

懲妄誇無不可能之謬

憑藉依賴

懲形色質數非真之謬

懲妄言恕敗之謬

星縮畧解

續星縮畧解

聖識述餘

無目的之問題 自由平等

有形無形畧解

懲自由反噬

語學考

懲覆政府滅宗教之非

懲均富共產之謬

野蠻無定界

不能無死

新名詞闡明反對奧義

滿三千號祝文

覆滅

政府
宗教

圖謀

鉤富
共產

小說

東西哲衡下卷目次

天則百話書後

續天則百話書後

再續天則百話書後

三續天則百話書後

自由

四續天則百話書後

醉魔劑

五續天則百話書後

美術

六續天則百話書後

善惡

七續天則百話書後

論食

福澤先生談叢書後

仁學書後

續仁學書後

抑古之謬

書橫濱清議報百號之後

道德微言

讀基督教歷史者須知

懲妄誇文明進化

範圍說

未開半開畧釋

基督教不爲枯寂而傳

基督教不以諛諂誨人

神聖考據

譯界須知

論史

論過

創世時期與安息日密切

基督教性質

直視解

幼慧蚤發之大不幸

中華纏足印度類規

婚姻之奴隸

懲無神論之妄

結論

東西哲衡上卷

鷺江李春生輯

懲妄擬宇宙胚胎之謬

溯自文明開幕以來，歷茲數百餘年，奇藝輒出，異事頻見，虛虛幻幻，充塞耳竅，形形色色，刺激眼簾，甚有捕風捉影之文，以炫其說之可貴，不顧貽害社會人心之足悲，請言之。古有額拉吉來圖者，曰火爲宇宙根本，謂萬物皆出於火，皆入於火，由火生成，由火毀滅，遞劫盈虛，週而復始，爾後達爾文輩繼起，心急於傾覆宗教，以保持其自由平等宗旨，於是執此爲柄，畫蛇添足，變本加厲，造謂太初洪鈞未開之時，舉穹蒼爲整大團火霧，久而久之，遇冰期漸冷漸縮，縮至四分五裂，而後分判凝結，各成爲日月諸星，地球亦諸星之一，又曰越縮越小，縮率靡有止期，將來地球必縮至無抵抗力，併入於太陽，是等學說，非理想，非考據，更非實驗，不過借以爲攻訐宗教，因創世記原載太初穹蒼是水，今欲抵

隙其教，不得不效說部周公瑾故智，巧用火攻，不知真理難滅也。屬水屬火，稟有靈明者，皆能判之。蓋水之爲質，大都爲成物而設；火之秉性，幾皆爲毀物之用。卽有些須資爲成物者，亦出於間接，有直接者，厥惟鍛鍊而已。且也，誠如其所謂洪荒之時，穹蒼充塞，火霧是無遺隙地，亦無他物，惟當知水之爲物，是能無所憑藉而自生，火之爲質，必待資有氣而後活。試問值是之時，舉穹蒼既充塞火霧，必藉有別一穹蒼，儲水化氣以濟其銷耗。否則此整大團火霧，決不能耐此不可思議之長時間，是一大謬也。又曰遇冰期則漸縮，試問水火既不相容，且同是一穹蒼，則此冰期不知胡從而遇，是二大謬也。況地球雖縮至今形，要亦同此火霧鍛結而來者。若然，試問火既遇物卽燃，何地面滄海江河，不被蒸涸吸盡？其他土石泥沙，亦不爲鍛成磁殼，更能藏許多燃料？若者曰煤炭硫磺、石油、朴硝等類，是三大謬也。若輩間嘗侈言世界進化，信如所謂地球日縮日小，久而久之，必併入於太陽，是退化非進化也。蓋被併爲言，行見將來世

無瞧類矣，是四大謬也。抑又曰：自有火爲宇宙根本一言，累至他格致家，亦別造一說曰：地球中央，尙遺整大團鎔質之火，惜其不但不明言，是先有鎔質大火，然後包裹以地殼，抑先有地殼然後灌之以鎔質之大火，而又不能指出何質之火，不知是電是神，是螢是燐，若其亦爲尋常之火，我又未聞地面有進氣之洞，如又曰：是海水化氣以資其消耗，奈何歷此長歲月，又未見其枯智，若曰：是不資氣之神火，無奈其平日不信憑虛，斷不肯以神相夾雜，如此者，是亦一未定位之大謬也。此不過畧舉以概，必我盡罄若輩之謬，不免洛陽紙貴，然既有此五大謬可據，雖任其身稱鉅子，位列文豪，舌若簧鼓，口若懸河，要不能強詞奪理，以是作非，強有爲無，所以彼雖絞盡畢生腦髓汗血，誓與基督教角逐爭競，終無以爲也。蓋公道自在，真理難滅，大抵是等詭邪之說，風雲變態，出於虛構幻結，不能據爲定論。因昔者列國天文家，勘定月球確無生氣，據爲鐵案，嗣於近年來，法國天文士，用最精望遠鏡，測見月中火山吐烟，始知月球尙有

生氣因火必資氣而後能生存，職是衆天學家聚訟紛紛，莫衷一是，嗟乎似此有可觀測實驗者，然尙朝三暮四，昔是今非，況夫無所憑藉考據者，安能妄斷宇宙如何胚胎，地球若干年齡，天地確是自然，萬物不待造化，且謂人是由猿而變，水是從火而出，種種譚言囁語，微特無一毫價值，徒令識者笑爲喪心病狂，所願新學界中人，執孔子擇善而從之訓，毋爲若輩謬說所惑，則可云爾。

懲妄擬地球年齡之謬

人生天地間，優異禽獸者，在稟有造化所賦之靈明，方能辨別是非，調劑庶類，故是之謂萬物之靈，雖然靈則靈矣，要知其靈未嘗無限，是故大學云，蓋人心之靈，莫不有知，而天下之物，莫不有理，惟於理有未窮，故其知有不盡，是以大學始教，必使學者，卽凡天下之物，莫不因其已知之理，而益窮之，以求至乎其極云云，是極也，所以表其有限，非謂無所不至其極之無限也，所以孔子曰，知之謂知之，不知謂不知是知也，今也不然，蓋今之稱賢道智，若太西之詭邪派，

怪哲家者，匪唯不肯止於其極，且欲底於無所不至其極，故雖不知，必欲強作爲知，所以天下不能無亂。若近世諸西怪哲，達爾文、斯賓塞、赫胥黎之三者，狼狽相依，誓與宗教爲敵，強以不知爲知，捏造一種學說，曰地球年齡，自洪荒以來，歷二千餘萬年，或至八九千萬年。又曰，稽自人類發現及今，亦有二十四萬年云云。是說蓋備與耶穌教創世記年曆相衝突，因依聖經歷史考證，自搏土造人於茲，猶未及萬年。二說相衡，一爲杜撰，一屬神示。今苟無論孰是孰非，旣非身適其際，復不能逆溯往境，亦惟當其爲泡影苔痕，所不解者，旣發是論，奈何復援物類生機速率比例，以相刺謬。其言曰：

萬類生生，各用幾何級數，使滅亡之數，不遠過於所存，則瞬息之間，地球乃無隙地。人類孳乳較遲，然使衣食裁足，則二十五年，其數自倍，不及千年，一男女所生，當徧大陸也。生子最稀，莫如象，往者達爾文嘗計其數矣。法以牝牡一雙，三十歲而生子，至九十而止，中間經數，各生六子，壽各百年，如是以

往，至七百四十許年，當得見象一千九百萬也。又赫胥黎云：大地出水之陸，約爲方迷盧五十一兆。今設其寒溫相若，肥鹵又相若，而草木所資之地漿、日熱、炭養、亞摩尼亞，莫不相同。如是設有一樹，及年長成，年出五十子，此爲植物出子甚少之數。但羣子隨風而颺，枚枚得活，各占地皮一方英尺，亦爲不疏。如是計之，得九年之後，徧地皆此種樹，而尙不足五百三十一萬三千二百六十六垓方英尺。此非臆造之言，有名數可稽云云。

按此可知地球年齡尙在稚幼，非二十四萬年之足憑。何則？果爾地球年齡若是之老大，而生物又若是之速率，其蔓延蕃衍，雖任除去，莫論如何吞噬屠宰，燒失死亡，歷此二十四萬年之長時間，生者不計，自餘骸骨鱗甲、枯枝殘葉，卽不敷以堆滿江河滄海，亦足以填平大地皺痕。若是者，安得尙有許多人跡未到之乾淨土？用是觀之，耶穌教歷史所載，自生民以來，地球年齡未及萬年，似可據爲鐵案。無他，以其矛還攻其盾，非余之創說也。或曰：彼格致家洞識萬理，

故能發明種種奇技異藝，裨益民生，受社會歡迎，何致疏忽檢點，一至乃爾，曰有是哉，所以然者，恃其才而自居命位置，眼空一切，信口開河，無能或禁之也，因其所言，朝三有效，雖暮四無憑，亦無能或咎之，不然者，究其所說地球年齡，自洪荒歷茲二千餘萬年，或至八九千萬年，實斯一語，可知其妄謬甚於蜃樓海市，蓋蜃樓海市，由來必先有象召之，非若此無稽臆造之八九千萬年，在彼倡爲是說者，總恃其無敢或詰之者，所以讓差六七千萬年，爲有餘不盡，進退加減之地步，噫嘻，斯乃彼怪哲家，破天荒僅見之大讓者，是猶安得因其素行寡恩刻薄，而厚非之耶，獨不知，不必確辯是數之謊誕，就令自有人類已歷二十四萬年，一言證之，亦可知其狂妄訛謬，莫此爲甚，若曰，是由地層中殭石考察而知，無奈是殭石者，不能自刊其所歷年數，若是之繁多，致人於可信，況自有文字閱今，不過五六千年，石既無靈，安能前知應用何國文字爲準繩，誌其所歷之年數，嗚呼，似此云爲，標爲文明世界之哲說，我又安忍而多辯之耶。